

# La'ó Hamutuk Rekomenda Governu Prioritiza Setór Productivu

30/10/2018



Enkontru públiku entre sociedade sívil nomós governu representa Sekretáriu Estadu Komunikasaun Sosiál (SEKOMS), Merício Juvinal dos Reis "Akara" ho entidade relevante, subordinadu ho tema; Orsamentu Estadu Ba Ne'ebé De'it no Oinsá Previzaun Ba Oin?". Foto SEKOMS: Verónica Ximenes.

**DILI, (TATOLI)** – Institutu Dezenvolvimentu, Monitorizasaun no Peskiza, La'ó Hamutuk rekomenda ba governu atu aloka orsamentu barak liu ba servisu báziku, prioritiza setór ekonómiku productivu sira hodi troka reseita mina no gás no nia retornu investimentu.

Inklui, rekomenda governu hapara gasta povu Timor-Leste nia osan ba Projetu Tasi Mane, to'ó tempu ne'ebé iha ona analize kustu benefísiu no risku nomós rekomenda atu governu kontinua atu labele simu emprestímu.

Rekomendasaun ne'e hato'ó husi peskizadór La'ó Hamutuk, Celestino Gusmão, nomós Elizaria Febe Gomes, iha âmbito enkontru públiku entre sociedade sívil nomós governu representa Sekretáriu Estadu Komunikasaun Sosiál (SEKOMS), Merício Juvinal dos Reis Akara, ho entidade relevante, subordinadu ho tema; Orsamentu Estadu Ba Ne'ebé De'it no Oinsá Previzaun Ba Oin?".

"Ami-nia rekomendasaun atu bele kuidadu ho fundu sira inklui agora, iha nesesidade urjente atu investe ba setór productivu sira, liliu ekonomia povu nian; bee moos, má nutrisaun, qualidade edukasaun, kuidadu saúde; hothotu ne'e presiza tau prioridade atu bele asegura ita-nia seguransa umana", hateten peskizadór, Celestino Gusmão, ba jornalista sira, iha salaun HAK, Farol, ohin.

Pozisaun La'ó Hamutuk mak hapara Projetu Tasi Mane, evita moras *Olanda* (malisan rekursu) no akontese *Austeridade* (rigór iha kontrola ba gastu).

"Pozisaun ida ne'e hakarak fó hatene ba governu Timor-Leste katak iha nesesidade urjente atu

investe ba ema nia moris, nune'e ema bele seguru; ita prodús ema ho qualidade hamoris fali setór produtivu sira ne'ebé seguru no sustentável duke ita investe ba projetu Tasi mane ne'ebé nia retornu, nia benefísiu la klaru", afirma.

Tuir La'ó Hamutuk labele soe osan ba projetu sira ne'ebé nia benefísiu la klaru hodi sakrifika sidadaun ne'ebé urjentemente hein hela intrevensaun no apoiu. Liliu, edukasaun segura no qualidade.

Se la fó prioridade ba edukasaun tan, jerasaun hela nafatin ho má nutrisaun, hakarak hela nafatin ho kapasidade mínimu, hanesan situasaun ne'ebé hatudu agora.

Iha fatin hanesan, reprejenta ezekutivu, Merício Akara, hateten informasaun no hanoin di'ak sira husi sociedade sivil importante, tanba hanesan parseiru estratéjia governu nian; sei konsidera hodi halo programa no planu di'ak liután iha tinan hirak tuir mai.

Planu prioridade governu da-ualu mak agrikultura, turizmu no nafatin mantein setór petróleu atu sai hanesan fundamentu ekonomia nasaun nian, inklui nesiedade sosiál, setór sosiál, nafatin tau prioridade edukasaun, liliu iha kapitál umanu.

Tanba ne'e mak governu mantein nafatin Fundu Dezenvolvimentu Kapitál Umanu. "Polítika ida ne'e eziste i mantein", subliña Sekretáriu Estadu, Merício Akara.

Sekretáriu Estadu katak iha ezersísiu, nesiedade imediata balun; kurtu prazu, ne'ebé governu tenke haree. Tanba ida ne'e mak tau-matan nafatin ba idozu sira, veteranu, juventude.

"Ne'ebé, 2019, 2020, ita sei haree, oinsá halo ekilibru ba alokasaun orsamentu i kuaze rekomendasaun ka pergunta ne'ebé sociedade sivil sira fó ne'e *input* (hanoin) di'ak, ita sei uza hanesan referénsia hodi halo polítiku, hodi halo programa, hodi halo orsamentu di'ak liu i informasaun sira hanesan ne'e presiza kontinua", konsidera.

Entretantu, iha ninia apresentasaun, Orsamentu Jerál Estadu (OJE) 2018 nia baze legál mak Lei Orsamentu, Jestaun Finansa Públika No. 13/2009 2.

Dekretu Governu número 1/2018, 12 janeiru; kona-ba ezekusaun orsamentu iha réjime Duodésimu, ba janeiru to'o juñu 2018 (duo decimo primeiro).

Dekretu Governu nú. 8/2018 16 jullu (alteração ba deketu governu nú. 1 /2018) kona-ba ezekusaun orsamentál iha réjime duodésimu jullu to'o agostu 2018. (duo decimo segundo)

No, lei nú.1/2018 10 agostu kona-ba autorizasaun estraordinária hodi realiza transferénsia fundu petrolíferu nomós lei OJE número 2/2018, 27 setembru kona-ba Orsamentu Jerál Estadu 2018 30/10/2018.

Iha apresentasaun ne'e relata total no fonte OJE 2018 mak USD 1,277,372 husi reseita naun-petrolífera inklui reseita própria servisu no fundu autónomu ho montante USD 188,8; transferénsia husi fundu petrolíferu ho montante USD 982,5, emprestímu ho montante USD 61,6 no utilizasaun saldu konta tezoru ho montante USD 44,4.

Gastu OJE 2018; OJE 2018 (USD 1,277,372) kabe finansiamentu husi janeiru to'o dezembru

2018. Durante janeiru to'o setembru 2018, governu gasta ona porsentu 80 liuhusi ezekusaun orsamentu duodesimál husi janeiru to'o setembru 2018.

Signifika, saldu iha konta governu husi OJE 2018 ne'ebé atu gasta ba outubru to'o dezembru 2018 hela de'it porsentu 20 husi totál OJE 2018 billiaun USD 1,277,372.

Kona-ba alokasaun, alokasaun OJE 2018 (USD 1,277,372), alokadu ba kategória orsamentál sira; saláriu no vensimentu milliaun USD 200,253, bens no servisu, milliaun USD 354,031, transferénsia públika milliaun USD 324,222, kapitál menór milliaun USD 5,117 no kapitál dezvoltimentu (inklui fundu Infraestrutura no imprestimu ho totál milliaun USD 393,748.

Foku ezekusaun orsamentál tinan 2018; bazea ba programa governu 2018, OJE 2018 kobre finansiametu ba programa prioridade ka importante hanesan dezvoltimentu kapitál sosiál; maksimiza potenciál hotu, promove inkluzau; kapitalizasaun no kualidade de servisu saúde.

Dezvoltimentu infrastrutura; investe ba infrastrutura kualidade ho garantia iha kustu benefísiu iha forma ida sustentabilidade no produtivu, kria empregu no dezvoltimentu setór privadu.

Dezvoltimentu ekonomia; programa ho medidas modernizasaun no diversifikasaun iha setór produtivu tolu hanesan agrikultura, turizmu no petróleo. Inklui, boa Governasaun-foku ba kobre gastu administrasaun Funsau Públika.

Husi OJE 2018, orsamentu ba kada setór mak Parlamentu Nasionál (PN) ho montante USD 10,396, Primeiru-Ministru USD 5,635, MPCM 3,635, SEII 684, Ministru Koordenadór Asuntu Ekonómiku 836, SEPFOPE 2,045, Sekretária Estadu Kooperativa 694, Sekretária Estadu Ambiente 695, MRLAP 1,131, SECOMS 3,083, MoF 13,059.

Dotasaun governu hotu (USD 207,198), Ministériu Agrikultura no Peska (MAP), USD 7,016, Ministériu Defeza (MD), USD 3,087, Falintil-Forsa Defeza Timor-Leste (F-FDTL), USD 17,522, Ministériu Interiór (MI), USD 9,467, Polísia Nasionál Timor-Leste (PNTL), USD 27,379, Ministériu Petróleo no Minerál (MPM), USD 12,808, Tribunál, USD 2,974, Prokuradória Jerál (PJ), USD 2,594, Provedória Direitu Humanos no Justisa (PDHJ), USD 1,129, Komisaun Anti Korupsau (KAK), USD 1,043, Komisaun Funsau Públika (KFP), USD 2,008, seluk tan inklui munisipál (bele asesu informasaun detalla iha lei OJE 2018, nú 2/2018).

Enkuantu, apresentasaun La'ó Hamutuk nian mak kona-ba "Tendénsia Orsamentu no Sustentabilidade" no apresenta husi peskidadór La'ó Hamutuk, Celestino Gusmão no Elizaria Febe Gomes.

Enkontru públiku ne'e organiza husi La'ó Hamutuk no FONGTIL (Fórum ONG Timor-Leste).

Apresentasaun La'ó Hamutuk ne'e, bele asesu mós iha link ne'e; [http://www.laohamutuk.org/econ/OGE19/18OGE19.htm?fbclid=IwAR3GeM4S8Ks3iab\\_Nk4\\_i\\_Sef\\_dqDy8zPsQcnJpjghuzDjXo5xcJiziDVhE](http://www.laohamutuk.org/econ/OGE19/18OGE19.htm?fbclid=IwAR3GeM4S8Ks3iab_Nk4_i_Sef_dqDy8zPsQcnJpjghuzDjXo5xcJiziDVhE)

**Jornalista: Rify Belo**

**Editora: Rita Almeida**